

Dumonda Berther concernent lais d'accumulaziun pitschens en connex cun la finamira da la Regenza 8

Las consequenzas da la midada dal clima sa mussan en il chantun Grischun pli e pli savens tras periodas da setgira pli lungas, tras precipitaziuns extremas pli frequentas, tras ina ristga pli gronda d'incendis da guaud sco er tras grevezzas pli e pli grondas per l'agricultura, per il turissem e per la biodiversitad. A medem temp procura la vieuta energetica per novas pretensiuns envers in provediment segir ed envers ina infrastruttura resistent a il clima.

Lais d'accumulaziun pitschens, pia spazis da retenziun creads artificialmain u revalitads en moda natirala cun in volumen d'accumulaziun da main che 100 000 m³, pudessan surpigliar ina rolla impurtanta en il rom d'ina strategia d'adattaziun integrala al clima. Ultra da lur funcziuns per il provediment d'aua e per la prevenziun d'incendis da guaud cuntengnan els er il potenzial per l'accumulaziun d'energia decentrala. En cumbinaziun cun implants fotovoltaiics u cun ovras idraulicas pitschnas alpinas pon els vegnir duvrads sco plimatsch per accumular energia durant la stagiun u durant il di, en spezial en il senn da pitschnas soluziuns d'accumulaziun a pompa.

Uschia resultan plirs avantatgs per l'agricultura, per la segirezza, per il turissem, per la biodiversitad e per il provediment d'energia, quai en concordanza cun la finamira da la Regenza 8 dal Program da la Regenza 2025–2028 «Green Deal – Clima, energia e privels da la natira».

Sut quest aspect tschentain nus las suandantas dumondas a la Regenza:

1. Stimaziun dal potenzial

Co valitescha la Regenza il potenzial da lais d'accumulaziun pitschens per vegnir a frida a medem temp cun las sfidas chaschunadas dal clima, en spezial en ils secturs dal management da l'aua, dal provediment d'aua da stizzar fieu, da la biodiversitad e sco contribuziun decentrala a l'accumulaziun d'energia en il rom da la strategia chantunala d'energia?

2. Integraziun en la planisaziun da l'energia e dal clima

Quant enavant vegnan lais d'accumulaziun pitschens resguardads en la planisaziun actuala da l'energia e dal clima dal chantun, per exempel en connex cun concepts d'accumulaziun a pompa, cun il rinforzament dal provediment decentral d'energia u en cumbinaziun cun implants fotovoltaiics ed idraulics?

3. Premissas regulatoricas e finanzialas

Tge cundiziuns generalas giuridicas, planisatoricas u finanzialas stuessan vegnir stgaffidas u adattadas per pudair promover sistematicamain ils lais d'accumulaziun pitschens sco elements d'infrastruttura che han in effect sin il clima? Existan gia programs da promozion sin plaun chantunal u federal?

4. Colliaziun cun il guaud da protecziun e cun il management da las ristgas

Tge puncts da contact vesa la Regenza tranter lais d'accumulaziun pitschens ed il management dal guaud da protecziun respectivamain il management integral dals privels da la natira, en spezial en vista al fatg ch'i dat dapli periodas da setgira, dapli erosion e ristgas pli grondas d'incendis?

5. Realisaziun strategica e projects da pilot

Èn previs – en il rom dal Green Deal – projects da pilot, studis u ina strategia surordinada per identifitgar ils potenzials per lais d'accumulaziun pitschens, per priorisar lieus adattads e per trair a niz sistematicamain sinergias cun vischnancas, cun l'agricultura, cun interpresas dal provediment d'energia e cun instituziuns turisticas?

Cuira, ils 13 da zercladur 2025

Berther, Berweger, Roffler, Altmann, Beeli, Binkert, Brandenburger-Caderas, Brunold, Bundi, Caluori, Casutt, Censi, Collenberg, Cramer, Della Cà, Derungs, Epp, Furger, Gansner, Grass, Hartmann, Heim, Holzinger-Loretz, Lamprecht, Loepfe, Luzio, Mani, Messmer-Blumer, Micheli, Oesch, Rageth, Righetti, Said Bucher, Sax, Schutz, Sgier, Spagnolatti, Tomaschett, Ulber, von Ballmoos, von Tscharn, Wieland, Zanetti (Sent)